

## UKWỌRỌ-IKỌ KE ENYỌN̄ OBOT, ỌYỌHỌ 3

Matthew 7:1-29

### ỌYỌHỌ UKPEP-ŃKPỌ 21 – Eke Ikọ Owo

**IKỌ IBUOT:** “Ntre sededi mbufo eyomde owo enam ye mbufo, enam kpa ntre ye mmọ” (Matthew 7:12).

#### **I Mme Utom Emi Owo Abasi Enyenede Ndinam Nnọ Mbọhiduñ Esie**

1. Imekke Owo Abasi ndidi ebieren-ikpe, edi, edi asaña-utom, Matthew 7:1, 2; John 12:47, 48
2. Ufọn owo ndinana ndo ke abaña ndikpe ikpe nnọ mbon efen, Matthew 7:3-5; Nwede Mbon Rome 2:1
3. Ọwọrọ ikpikpu ndikwọrọ ikọ nnọ mbon nsobo, Matthew 7:6; 10:14, 15
4. Mbọm Abasi ke abaña kpukpru mmọ emi eyomde Enye ke ofuri esit, Matthew 7:7, 8; Luke 6:36
5. Ete nnyin emi odude ke enyọn̄ ọsọp ndinọ uñwam ñkan mme ete nnyin emi edude ke isọñ, Matthew 7:9-11; Isaiah 65:24
6. Edikpeme “Akakan Mbet” ke ini anamde ñkpọ ye mbio efen, Matthew 7:12; Nwede Mbon Rome 13:10

#### **II Usuñ Emi Akade Obio Abasi Ye Usuñ Emi Akade Nsobo**

7. Inua otop emi atarade ye ọkpọusuñ emi añañade emi akade nsobo, Matthew 7:13; Mme Nke 14:12
8. Inua-otop emi afahade ye ọkpọusuñ emi esirede emi akade nsinsi uwem, Matthew 7:14; Mme Nke 4:18
9. Mme anditiñ ntiñ-nim ikọ abiaña ye usuñ nte ekemede ndiyarade mmọ, Matthew 7:15-20; Nwede Mbon Ephesus 5:9-11; 1 John 3:10
10. Mmọ emi edọhọde ete idi mbon Abasi edi inamke akpanikọ, Matthew 7:21-23; Micah 6:8
11. Edibọp ndori ke utan ye edibọp ndori ke Itiat, Matthew 7:24-27; 1 Nwede Corinth 3:11
12. Se odudu Christ anamde ke otu owo, Matthew 7:28, 29; Isaiah 61:1-3.

### SE EKPEPDE EBAÑA

“Ekusioño owo ndo, mbak edisioño mbufo ndo.” Ndusuk owo ebieren eto ke ufañ Ikọ Abasi emi ete ke nnyin ikemeke ndidiọño anam idiọk-ñkpọ ye enye emi midighe. Ke ediwak ini emende idiọk uwem “etiñ ntiñ-nnim-ikọ abiaña” ewut enye aña-ña, ndusuk owo eyefaña ebaña idiọk-ñkpọ oro ke uwem esie enyuñ edọhọ ete, “O, edi nnyin ikemeke ndisioño ndo!”

Jesus ikaduakke ite mme ikọ Esie edi se edade efuk oruk idiọk-ñkpọ ekededi, edi Enye etiñ aña-ña ọnọ nnyin ete, “Mbufo eyeda mfri mmọ efiọk mmọ” (Matthew 7:16). “Ndima, ekunim kpukpru spirit ke akpanikọ, edi edomo mme spirit ese mme mmọ edi eke Abasi: koro ediwak prophet nsu ema ewọño eduk edi ke ererimbot” (1 John 4:1). John aka iso etiñ ọnọ nnyin ete, “Nkpri nditọ mi, ekuyak baba owo kiet ada mbufo awaha ọkpọñ usuñ: owo eke anamde edinen ido edi edinen, kpa nte Enye edide edinen; owo eke anamde idiọk-ñkpọ edi eke Satan” (1 John 3:7, 8).

Ndien edieke anade nte nnyin idomo mme spirit ise man ifiọk eti ye idiọk, ikọ item emi ọwọrọ didie, “Ekusioño owo ndo, mbak owo edisioño mbufo ndo”? Ke Nwede John 7:24 Jesus ama ọdọhọ ete, “Ekukpe ikpe nte etiede owo ke enyin, edi ekpe edinen ikpe.” Man ekeme ndikpe edinen ikpe odot nditiene item emi Peter ọnọde, “Akan kpukpru ñkpọ, enyene ufiop-ufiop ima ke otu idem mbufo; koro ima ofukde ekese idiọk-ñkpọ” (1 Peter 4:8). Edieke ima akarade uwem nnyin, nte Paul etiñde ke ọyọhọ ibuot 13: ke 1 Nwede Corinth, nnyin ididaha ekikere nnyin isọp ndibiere ikpe nnọ mmọ efen, ke minyeneke ọyọhọ isọñ ke abaña ekikere mme ubierikpe nnyin. Edieke mfina odude ke ufọt nnyin ye eyen-ete, nnyin inyene ndiduñre idem nnyin nse mme ana nte nnyin ibemiso “isio obukpọk” ke enyin nnyin ndien nnyin iyeda ke eti idaha “ndisio mbio” ke enyin eyen-ete nnyin mfep.

Mbio edi ata ekpri mbehe ñkpọ, ke ini obukpọk edide ata akamba ibio eto. Jesus mi emen owut ete ke ndudue nnyin ekeme ndibiọño ido nte nnyin ikutde ñkpọ, inyuñ ikpede ikpe inọ mmọ efen.

“Ekumen edisana ñkpọ enọ ebua.” Ndinọ “edisana ñkpọ” etiñ abaña edikwọrọ Ikọ. Enyene ndida mbufiọk ñkama Eti-mbuk. Ke ini Jesus okosioñode mbet Esie ọdọñ iba-iba Enye ama ọdọhọ mmọ ete ekwọrọ Ikọ ke mme obio eke mmọ edukde; edieke mmọ enyimedede Ikọ oro, yak etiñ emem enọ mmọ; edi edieke mmọ esinde, yak mmọ ekeñ ntan ikpat mmọ do enyuñ enyọñ. Ndisuhọ do nnyuñ ndomo ndinyik mmọ ekop Ikọ Abasi ekpetie nte “ndimen edisana ñkpọ nnọ mme ebua.”

“Ebeñe, ndien eyenọ mbufo.” Abasi amama ndibọrọ akam: ndusuk, ke ediwak idaha Enye omomum ibọrọ akam akama ke esisit ini. Ndusuk ini nnyin ineñere ibọñ akam ibaña se nnyin idiọñọde ite ke Abasi ama ọñwọñọ ndinam emi onyũ asañade nte ekemde ye Iko Esie; ndien nnyin iyom, inyũ iyom, mme ibọrọ idighe. Nso idi ntak emi emumde mme ibọrọ emi ekama? Edi koro Abasi oyomde nnyin ida ke ebiet eke nnyin ibeñede idem ndibọ ibọrọ. Ndusuk owo ema edọhọ ete, “Ami mma nyom ke ata anyan ini, edi ami mmonim nte Abasi eyenọ mi ke ini emi Enye amade.” Ke ini emi nnyin isimde ke ebiet emi Abasi oyomde nnyin ida, Enye eyenọ nnyin udeme nnyin.

Ndusuk idaha Enye oyom ndisọñọ mbuotidem nnyin ke ndimum ibọrọ akam ñkama ke esisit ini. Ke Malachi 3:10 nnyin ikut ufañ ñwed emi ekemede ndidi ibọrọ ke ndusuk idaha: “Mbufo eda kpukpru ọyọhọ mbak duop edisin ke ufọk unim-ñkpọ, man udia odu ke ufọk mi, ndien eda emi edomo mi, Jehovah mme udim ọdọhọ, mme ami ndiberekede window heaven nnọ mbufo nnyũ ññwafña nti ñkpọ nnọ mbufo, tutu akaha.” James ọnọ nnyin ekikere efen eke ebietde emi: “Mbufo ebeñe, edi inọñọ mbufo koro mbufo ebeñede ke idiọk usuñ, man eda edep ñkpọ mbre” (James 4:3).

Idiọñọ ufañ duopeba ke edikot ñwed nnyin nte Akakan Mbet Uwem. Etop esie onyũ ebiet kiet ke otu mme ikpọ mbet iba emi “Ma mbọhiduñ fo nte idem fo” (Matthew 22:39). Ndusuk owo enyũ ebure ete ke mme imọ imodu uwem ikem nte Akakan Mbet Uwem emi etemede; edi nnyin inyene ndinyene ata ima Abasi ke ọwọñ-esit nnyin man ikeme ndikpeme nnyũ nnam emi kpukpru ini. Ekeme ndisim idaha ima emi ke owo amanade obufa ke esit.

Edieke ima edide ntak edinam nnyin, mme utom eke inyenede ndinam idibiakke nnyin, utom ididighe aba mbiomo. Idem ekeme ndimem nnyin, edi ima eyeda nnyin ebe ke mmọ kpukpru, ndien ididighe ọkpọsọñ ñkpọ inọ nnyin ndinam Akakan Mbet Uwem. “Enọ, ndien eyenọ mbufo; eyedomo ọyọhọ udomo eke emiñde ọsuhọre, eke enyeñede, onyũ ọyọhọde ọduọhọ, esin mbufo ke ọfọñ. Koro udomo eke mbufo edade edomo enọ owo, ke edida edomo enọ mbufo” (Luke 6:38). “Idighe kpukpru owo emi ekotde Mi ete, Ọbọñ, Ọbọñ, ediduk ke Obio Ubọñ Heaven, edi owo eke anamde uyo Ete Mi emi odude ke heaven.” Oro edi udomo; oro edi udomo-ñkpọ emi edinen Ebire-ikpe edidade ekpe ikpe ọnọ kpukpru nnyin ke akpatre usen.

Owo emi ọfiokde ñkpọ akan ke ofuri ererimbot ama ọnọ nnyin mbiet item oro; “Yak nnyin ikop utit ofuri ñkpọ emi: bak Abasi, nyũ nim mbet Esie: koro emi edi eke kpukpru owo” (Ecclesiastes 12:13). Edi ata ọkpọsọñ ñkpọ nnyin ndinam emi, ibọhọke nnyin ibem kaña iso inyene ata nnen-nnen edinyaña nsio ke idiọk-ñkpọ. Do ndien ke edidi mmem-mmem ndinam “uyo Ete Mi,” nte etemede nnyin ke ofuri ofuri Ukwọrọ-ikọ ke enyọñ Obot.

“Mkpaidem omum ediwak owo.” Odot nte ererimbot edude ke mkpaidem, ke ini Andinam Enyọñ ye isọñ, Ih, ke mbiet owo emi enyenede ndikpa ọkpọsuhọrede edi ke isọñ ndikpep mme owo nte edude uwem! “Koro Enye ekpep mmọ ñkpọ nte owo emi enyenede odudu.” Nte Enye idighe akakan odudu Emi baba esop nduñọre efen minyũ iduhe? “Koro kpukpru nnyin inyene ndiwọrọ nyarade ke iso itie-ikpe Christ; man owo kiet kiet ọbọ utip eke ekemde ye se enye akanamde ke ikpọhidem, ye ñkpọ oro edide eti, ye onyũ edide idiọk” (2 Ñwed Corinth 5:10).

### **MME MBUME**

1. Nso idi ntak emi ndusuk owo esọpde ndibieme ikpe nnọ eyen-ete mmọ?
2. Mme eñwọñọ ifañ ke afo ekeme ndikut ke ibuot ñwed emi?
3. Nso idi “mfafaha inua-otop”?
4. Akakan Mbet Uwem etie nte kiet ke otu mme ikpọ mbet iba. Akamba ibet eken edi nso?
5. “Nte owo etet grape ke ñkukim, mme etet fig ke mbarekpe? Nso ke eda mbume emi edomo ke ñkañ spirit?”
6. Ewe edi mme ufañ ñwed ke ukpep-ñkpọ emi, emi etuahade ye ekikere nte kpukpru mmọ emi edomode ndika Heaven eyeduk do?
7. Nọ uwut-ñkpọ owo emi ọbọpde ufọk esie odori ke utan?
8. Nte afo emekeme ndinọ mme isọñ ke ikọ Abasi ntak emi mme Scribe mikekemeke ndikpep ye odudu?
9. Ndisine “ikpa erọñ” ọwọrọ didie?
10. Nso itibe ye eto eke miñwumke nti mfri?